

प्रमुख समाचार –

- गुजरात के सोमनाथ अमृत महोत्सव के चलते प्रधानमंत्री ह सोमनाथ मंदिर म करीन बिसेस महापूजा – किहीन ए मंदिर ह अटूट आस्था अउ दिव्यता के हरय प्रतीक।
- प्रदेश के कतकोन जिला म आज होइस “सोमनाथ स्वाभिमान पर्व” के आयोजन – रईपुर म होय कारीकरम म सामिल होइन मुख्यमंत्री साय– पचहत्तर बछर पहिली होय पुनर्निर्माण ल करीन सुरता।
- प्रदेश म होवइया नगरीय निकाय अउ त्रिस्तरीय पंचायत मनके आम अउ उपचुनई बर नामांकन पत्र भरे के प्रक्रिया आज ले होइस सुरू।

प्रधानमंत्री–सोमनाथ मंदिर

प्रधानमंत्री नरेंद्र मोदी ह किहीन हे कि सोमनाथ मंदिर ह अटूट आस्था दिव्यता अउ देस के शास्वत आत्मा के प्रतीक हरय। ओमन ह किहीन कि सोमनाथ अमृत परब ह सिरिफ अतीत के उत्सव नो हरय, बल्कि एहा अवइया हजार बछर तक देस के प्रेरणा बनही। गुजरात के सोमनाथ अमृत महोत्सव ल संबोधित करत हुए प्रधानमंत्री ह किहीन हे कि सोमनाथ ह लोगन मन ल ए सुरता दिलाथे के कोनो भी राष्ट्र ह तभे लंबा बेरा तक मजबूती ले खड़े रही सकत हे, जब तक ओहा अपन जड़ ले जुड़े रहय। प्रधानमंत्री ह किहीन कि ग्यारा मई उन्नीस सौ अंटानवे के तीन परमाणु परीक्षण करे गे रिहीस, जेखर माध्यम ले देस के वैज्ञानिक मन ह भारत के क्षमता के प्रदर्शन ल पूरा दुनिया के आगु करे रिहीन। एखर ले पहिली प्रधानमंत्री ह सोमनाथ मंदिर म बिसेस महापूजा करीन। ओमन ह मंदिर के शिखर म कुंभाभिषेक घलो करीन। मंदिर के इतिहास म पहिली घांव शिखर म ग्यारा ठिक तीरथ वाले जघा ले लाय गे पवित्र जल ले अभिषेक करे गीस। श्री मोदी ह ध्वजारोहण कारीकरम म घलो सामिल होइन। इही बीच, वायुसेना ह एयर सो करीन, जेमा सूर्यकिरण एयरोबेटिक्स टीम ह सोमनाथ के उपर सुधर करतब दिखाइन। हेलीकाप्टर ले फूल के बरसा करे गीस, जेखर बाद श्री मोदी ह बिसेस प्रदर्शन घलो देखिन।

छत्तीसगढ़–“सोमनाथ स्वाभिमान पर्व”

मुख्यमंत्री विष्णुदेव साय ह आज राजधानी रईपुर के महादेवघाट के हटकेश्वर महादेव मंदिर परिसर म होय “सोमनाथ स्वाभिमान पर्व” म सामिल होइन। ए बेरा म ओमन ह जनप्रतिनिधी अउ श्रध्दालू मनके संग गुजरात के सोमनाथ मंदिर ले वर्चुअली जुड़के प्रधानमंत्री नरेंद्र मोदी के संबोधन ल सुनिन। ए बेरा म मुख्यमंत्री ह किहीन कि पचहत्तर बछर के पहिली आजे के दिन सोमनाथ मंदिर के पुनर्निर्माण होय रिहीस अउ इही ऐतिहासिक अवसर ल देसभर म स्वाभिमान परब के रूप म मनाय जात हे। ओमन ह किहीन कि सोमनाथ मंदिर म घेरीबेरी हमला होइस, फेर मंदिर के आस्था अउ परंपरा ल खतम नइ करे जा सकिस। श्री साय ह किहीन कि पहिली घांव आक्रमण के बेरा मंदिर के पुजारी अउ श्रध्दालू मन ह मंदिर ल नइ छोड़िन अउ अपन प्राण दे दीन। उंखर त्याग ह आज घलो इतिहास म स्वर्ण अक्षर म अंकित हे। मुख्यमंत्री ह बतइन कि प्रदेश म देवी माता के मंदिर ल सक्तिपीठ योजना के माध्यम ले विकसित करे जात हे। अइसने, कबीरधाम जिला के भोरमदेव महादेव मंदिर ल स्वदेस दर्शन योजना के चलत एक सौ अड़तालीस करोड़ रुपिया के स्वीकृति मिले हे। ए बेरा म वन मंत्री केदार कश्यप, राजस्व मंत्री टंकराम वर्मा अउ कृषि मंत्री राम विचार नेताम ह मौजूद रिहीन। प्रदेश के कतकोन जिला म घलो आज “सोमनाथ स्वाभिमान पर्व” के आयोजन करे गीस।

छत्तीसगढ़–“सोमनाथ स्वाभिमान पर्व”–02

उहें, उपमुख्यमंत्री विजय शर्मा ह घलो भोरमदेव मंदिर परिसर म होय ‘सोमनाथ स्वाभिमान पर्व’ म सामिल होइन। ए बेरा म ओमन ह श्रध्दालू मन ल संबोधित करत हुए किहीन हे ए कारीकरम ह भारत के पुरातन संस्कृति अउ सभ्यता ल सुरता करे के मउका हे। अइसने, जांजगीर–चांपा जिला के धार्मिक नगरी खरौद म ‘सोमनाथ स्वाभिमान पर्व – अटूट आस्था के एक हजार वर्ष’ बिसय म श्री लक्ष्मणेश्वर मंदिर म बिसेस कारीकरम होइस। ए मंदिर परिसर म गुजरात के सोमनाथ अउ वाराणसी म होय कारीकरम के सीधा प्रसारण दिखाय गीस। कारीकरम म सांसद कमलेश जांगड़े, कलेक्टर जन्मेजय महोबे समेत बड़का संख्या म श्रध्दालू मन आय रिहीन। प्रदेश के कतकोन जिला म घलो आज सोमनाथ स्वाभिमान पर्व के आयोजन करे गीस।

विकसित भारत—जी राम जी

केंद्र सरकार ह विकसित भारत जी राम जी—गारंटी फॉर रोजगार अउ आजीविका मिशन ग्रामीण अधिनियम के क्रियान्वयन बर अधिसूचना जारी कर देहे। ए अधिनियम ह एसो एक जुलाई ले देसभर म लागू हो जही।

प्रधानमंत्री—एशिया संकट अपील

प्रधानमंत्री नरेंद्र मोदी ह पश्चिम एशिया संकट के चलत लोगन मन ले एक बछर तक सोना झन खरीदे, ईंधन के खपत कम करे अउ विदेशी मुद्रा ल बचाय के आग्रह करीन हे। हैदराबाद म काली एक टिन कारीकरम म श्री मोदी ह वर्क फ्रॉम होम बेवस्था ल एक घांव फेर सुरु करे के अपील करीन हे। प्रधानमंत्री के अपील ह अइसन बेरा म आइस हे, जब पश्चिम एशिया म बाढ़त तनाव अउ होर्मुज जल—डमरू—मध्य के तीरतखार के परेसानी के सेति वैश्विक कच्चा तेल के कीमत ह सरलग सत्तर डालर प्रति बैरल ले बाढ़ के लगभग एक सौ छब्बीस डालर प्रति बैरल हो गेहे। इही बीच, मुख्यमंत्री विष्णुदेव साय ह किहीन हे कि पश्चिम एशिया म जउन युध्द के स्थिति बने हुए हे ओखर असर दुनिया भर म पड़त हे अउ ओखर ले हमर देस ह घलो अछूता नइ रइही। एखरे सेति प्रधानमंत्री ह देस के लोगन मन ल बड़ जरूरी अउ सही सलाह दीन हे।

निकाय / पंचायत चुनाव—नामांकन

प्रदेस म होवइया नगरीय निकाय अउ त्रिस्तरीय पंचायत मनके आम अउ उपचुनई बर नामांकन पत्र भरे के प्रक्रिया आज ले सुरु हो गेहे, जउन अट्टारा मई तक चलही। नामांकन पत्र के जांच उन्नीस मई के करे जाही अउ उम्मीदवार मन ह इक्कीस मई तक अपन नांव ल वापिस ले सकही। मतदान ह एके चरण म एक जून के होही, जबकि परिणाम ह चार जून आना हे। जानबा के अनुसार नगरीय निकाय म अध्यक्ष के पांच अउ पार्षद के सतहत्तर समेत कुल बयासी पद बर चुनई होना हे। उहें, त्रिस्तरीय पंचायत म जनपद पंचायत सदस्य के दस, सरपंच के बयासी अउ पंच के एक हजार एक सौ छत्तीस समेत कुल एक हजार दू सौ अट्टाईस रिक्त पद बर चुनई कराय जाही।

माड मैत्री अभियान

नारायणपुर पुलिस ह आज सामुदायिक पुलिसिंग ल मजबूत करे के उद्देश्य ले माड मैत्री अभियान के सुरुआत करीन। नारायणपुर के हाई स्कूल मैदान म होय कारीकरम म पुलिस अधीक्षक रॉबिन्सन गुड़िया ह बतइन कि अभियान के उद्देश्य नक्सल प्रभावित अंदरूनी क्षेत्र के जवान लइका अउ इंहा के रहइया मन ल शिक्षा, खेल, स्वास्थ्य, रोजगार अउ सामाजिक गतिविधि ले जोड़ना हरय। कारीकरम म हमर फीट नारायणपुर के चलत सामूहिक जूंबा सत्र घलो होइस। ए बेरा म डायल एक सौ बारह वाहन सेवा, माड मैत्री रथ अउ बाईक पेट्रोलिंग टीम ल घलो हरा झंडी दिखाके भेजे गीस।

माओवादी—सामग्री बरामद

बीजापुर जिला के गंगालूर थाना क्षेत्र म सुरक्षा बल मन ह माओवादी मन कोति ले छुपाके राखेगे समान ल जब्त करीन हे। पुलिस ल सूचना मिले रिहीस कि डोडीतुमनार गांव के पहाड़ी क्षेत्र म माओवादी मन ह समान ल छिपाके राखे हे। एखरे आधार म पुलिस सहायता केंद्र पीडिया अउ गंगालूर थाना के संयुक्त टीम ह सर्च अभियान चलाइन। ए बेरा म भुंइया के भीतरी छिपाय गे एक टिक बंकर घलो मिले हे। सुरक्षा जांच के बाद उंहा ले बड़का मात्रा म बिस्फोटक सामग्री, हथियार, बैटरी, सोलर प्लेट, जनरेटर, वेल्डिंग मशीन अउ बीजीएल सेल ल बरामद करीन।

धमतरी—समर कैम्प

धमतरी जिला म एक महिना तक चलइया समर कैम्प के सुरुआत नौ मई ले हो गेहे। जिला प्रशासन ह अउ खेल विभाग के समन्वय ले चलत ए समर कैम्प ह आठ दिन तक चलही। जेमा खेल तकनीक के संगेसंग व्यक्तित्व विकास म विसेस जोर दे जात हे।

ज्वेलर्स—चोरी

रईपुर के खम्हारडीह थाना क्षेत्र के लक्ष्य ज्वेलर्स म शनिच्चर अउ ईतवार के रतिहा करीब एक करोड़ रुपिया के सोन—चांदी के गहना के चोरी होगे। ईतवार के दुकान बंद होय के सेति एखर जानकारी कारोबारी ल तुरते नइ हो पाइस, फेर सोमवार के बिहनिया जब ओहा दुकान खोलिस, तब चोरी के पता लगिस। पुलिस ह दुकान अउ तीरतखार म लगे सीसीटीवी कैमरा ले मामला के जांच करत हे।

मौसम

मौसम विभाग के अनुसार एक टिन निम्नदाब के क्षेत्र ह दक्षिण—पश्चिम बंगाल के खाड़ी ले लेके श्रीलंका के उत्तरी तट के उपर तक बने हुए हे। एखर संग उपरी हवा के चक्रीय चक्रवाती घेरा बिस्तारित हे। एखर, अवइया अड़तालीस घंटा म अउ प्रबल होय के संभावना हे। जेखर सेति, प्रदेस के मौसम म अगला चौबीस घंटा म तापमान ह बाढ़ सकत हे। उहें, मौसम के सुष्क रहे के आसार हे।

